



**ACTUWALITE** : ON ROVÎYE SOVÉNT CKI TRINNE DINS LÈS RIDANTS.

Bén èchu ki dji tchêye audjourdu dsus on ptit projet d’ rèclame ki dj’avéve machuré dins lès anêyes 50, do tins k’ “avou l’ Sabena on î èstéve dèdja”. L’ èst sûr k’ asteure ça n’sièrvira pus ☹. I gn’avéve ètou ène grande afitche. Èle prind tro d’ place po z-è fé “profiter” nos fidèles lîjeûs ☺.

\*

### L’PÈLÈRINÂDJE DA TCHOFILE

L’Tossint oute, dji roléve dsus l’ voye do Roû (savoz bén, l’ cine ki gripe deur po z-ariver à l’ cimintîre d’ Aujau) kan dj’a avisé l’ vî Tchofile. Ène plinne potêye d’ fleurs dins sès brès i s’ avéve djoké au mitan do tiène èt aaner à sayî d’ rawè s’n’ alinne. Dire ki, tot seû dispû dèz ans, i dwèt awè nén lon d’ nonante ans, si nén d’pus; dji l’a priyî d’ s’achîre a costé d’mi èt l’amwinrné à place. Bén k-dji n’uche k’ wêre di timps d’vant mi, sins fé ni iène ni deus, dji l’î a étou chûvu èt pwârter l’ pot. Arivés adlé l’ fosse di s’ feume ki n’duvéve pus awè yeut s’visite dispû sakants ans, i n’a pont fait d’ politèsse pou m’dimander d’lî rdrèssî l’ simpe crwès d’bwès èt m’ èvoyî foute dsus lès mannèstés lès rèsses d’ène tote èrunîye corone d’ arca. Dj’ a fait come i l’voléve èt minme prinde tot m’ tins. Après tot, s’i rindéve visite à l’ Mârdjo, c’èst k’il avéve ène sakwè à lî dîre “inte kat z-ouy”.



D’au lon dji l’a riwêti s’ aspoiyî dsus l’ crwè; à mitan clincî i donéve l’êr di sotnu ène fêle divize avou l’ dêrinne maujone di l’cine k’avéve pwârté l’marone pus d’ cinkante ans dins s’ mwinnâdje. Rarivé nén lon dli i m’a chéné ètinde ène sakwè come “t’va-t-i continuwer à djower insi avou mès pîds ? ... Si c’èst ça l’ Paradis, dji m’va prinde on biyèt po l’ Infîêr...” M’oyant ddrî li, i s’a pawènemint signî, toûné ène miète li potêye po l’ bén fé tnu è tère èt m’dîre : “On èrva, on va nd’aler vudî on pèkèt à l’Rèspe, mon l’ Boufioû”.

L’ eûre di m’raploû èstéve oute, dj’a don fait come li vî Tchofile li voléve. I comincéve à ploûre, dji n’aléve tot d’minme nén l’oblidjî à rdinskinde li tiène à pîds, risquer d’ prinde frèd èt lî racouti sès djoûs.

Atauvé, i m’a fait ène clignète, vûdî l’ mitan di s’gote èt m’dîre : “Insi vos èstoz rivnu fé in tou pa vèci ?” Vint ans k’on n’s’avéve pus vèyu èt maugré m’baube i m’avéve rionchu ! M’faut vos dîre ki l’ Tchofile ni dmèréve nén lon dèl

maujone di m’ grandmère. Pus djonne i

fiève cwamjî. Dji m’rimimbère si bèle bauchèle di ptite fêye ki vinéve sovént adlé li. Come padrî s’cassine gn’avéve dès rans, sins pourcia mins plins d’ foûr, dès eûres k’on î a passé au rkwè tins dès condjîs... Faura ptète k’in djoû dji vos conte lès sakants paskêyes k’Nikole èt mi... Mins c’est d’ l’ ôte istwêre, rivnans à citèle-ci. “Dijoz-m’, m’a-t-i lancî, vos k’avèz fait ène miète d’ètûdes, dijoz-m’ si c’est l’vrai ki l’ Paradis dès musulmans èst plin d’ bèlès bauchèles ki sont la rén k’à z’ayèssî lès omes djusk’a l’ fén dès tims ?” – Eu, fi-dj’, parètréve ki c’è-st-èspliké long èt laudje dins leû Bîbe, li Koran. – Insi, continuwa-t-i, dji sèréve musulman, dji m’ritrovéve au mitan d’co djonnètès-Ava Gardnèr, Bête Davis odobén Birdjite Bardo à Bén m’ lèyî sognî èt m’fé bistoker d’amichtauvé ki m’Mardjo n’avéve nén l’ idêye ?


– Dji n’ wazèréve vos l’ wadjî, mins, après tot, ça s’poréve. Kwèki, dji m’dimande si c’est do garanti d’avance... Pokwè m’dimandèz-vos ça ? D’vosse vikêfyé vos n’avoz stî mauy pwârté dsus lès afères d’ Èglîje èt asteûre vos balzinerî à vos mète dsus lès lisses d’ ène ètrandjîr ?” Il a stronné s’trwèzyinme gote. Taurdu po taurdu, i m’faléve sawè c’ki lî trotéve è l’ tièsse, dj’a co fait rmète ène toûrnêye d’catis. “A vos dj’èl pou Bén dîre, a-t-i rataké, dji sé Bén kça n’ira nén pus lon. M’Mardjo n’ èstéve nén dès pus lètchaudes èt, por lèye, li dwâr condjugal, faléve kça z-aye rade. Po z’awè tanawète tot m’ contint i m’faléve daler djusk’a Châlèrwè èt trover ène gayole po m’ canari.... Come mi feume tinéve li bouÛsse, ça n’a nén arivé sovént. Après, avou m’pitite pension, dji n’avéve pus branmint d’moyins èt, l’ âdje vinu, è mi scançon nérén. Dji m’a don rabatu dsus dès gazètes come “Li vîkêrie Parisiène”, “Plaiwbès”, evnd. Asteûre, leûs portraîts plins d’ bèlès rondeûs èt d’ lûjantès crayes n’arivenut minme pus à m’ doner l’ pus pitite vayance. Kan i gn’a pus rén come rècrèstance a vos vnu la pa-dzo on s’sint Bén près do trau, savoz... enfin, si vos vèyoZ cki dji vou dîre. C’nût ci, dj’a fait on rêve come dji nn’avéve mauy fait. Dj’èstéve au mitan d’ène nulêye d’ feumes.

Tèrtotes au pus bèles èt dislokêyes dins dès mousemints ki dj’î vèyéve au truviè. Dj’ èstéve ayèssî au pus mia kan dji m’a rtrové tot à trake èsséré pa lès djambes da... m’vîye Mârdjo. Èle m’î a èmantchî sins dîre ouf, djusse li tins di stièrni èt èle mi richoûrbéve Popol. N’sarîz dîre come ça m’a rtoûrné vilin... kça m’a ossi râde dispièrté. Dj’a sinti ène pitite frècheû. Ène glumyante cruweû, à pwinne ène pîçe di cink francs, m’ avéve ramouyî l’ pagna. Dijoz cki vos vloz, mins d’n’awè nén profité di m’ bia rêve, ça m’a fait bouÛre. Adon, dj’a tûzé, si c’est co po rviker rén k’avou lèye d’ parèyès coûtès doûceus po tote l’ètèrnité, dji voréve Bén sayî d’ m’adrèssî à ène ôte bawète, tant k’il èst co tins, po d’ prinde m’ dêrin biyèt...”

Dj’a stî incapâbe di réponse èt, m’ sintant tot bièsse, dj’a co fait rimpli lès vères. L’chîje trawêye, on a rintré à pîds amon Tchofile. Minme ki m’ a î falu dwârmu sakants eûres dsus l’ fautule au culot do feû avant di rprindre li voye avou m’n’auto...

L’èst sûr k’on n’va nén djouwer à fé l’ Freud...

Maugré tot, pinsèz cki vos vloz, mi, la-ddins dj’a, po on prumî, compris ki l’ Tchofile èstéve vnu dmander à Mardjo di l’lèyî ène miète trankile à



profiter d’sakants ptits momints d’simpe mërseû bouneûr. Après tot, ènn’don... mins, à î rtûzer, i m’chène èto k’il’ vèyéve co pus voltîye ki nêl pinséve èt kça comincéve à lî pèsèr di n’pus l’awè, minme mautoûrnêye èt nén tro bêtchaude, à sès costés. Èt vos, kwè ènnè pinsèz ?